



SIARAN MEDIA

KEMENTERIAN TENAGA, SAINS, TEKNOLOGI, ALAM SEKITAR DAN PERUBAHAN IKLIM

DAN

JABATAN ALAM SEKITAR

6 SEPTEMBER 2019

Kerajaan akan Berbincang dan Bekerjasama dengan Indonesia untuk Mengatasi Jerebu Merentasi Sempadan

6 SEPT 2019, KUCHING - Bacaan Indeks Pencemaran Udara (IPU) yang direkodkan pada hari ini di seluruh Malaysia pada jam 8:00 pagi menunjukkan 61 stesen mencatatkan status kualiti udara pada tahap sederhana. Walau bagaimanapun, 6 lagi stesen mencatatkan bacaan IPU pada tahap tidak sihat pada hari ini iaitu di Kuching (IPU 125), Samarahan (IPU 120), Sri Aman (IPU 166), Sibu (IPU 123), Miri (IPU 133) dan Sarikei (IPU 109).

Berdasarkan laporan ASMC pada 5 September 2019, imej satelit *National Oceanic and Atmospheric Administration (NOAA)* 20 mengesan sejumlah **1,393 titik panas (hotspots) di Indonesia** – (306) di Sumatera dan (1087) di Kalimantan; dan hanya 17 titik panas dikesan di dalam negara iaitu di Johor (2), Pahang (2), Perak (1), dan Sarawak (12).

Pelan Tindakan Pembakaran Terbuka Kebangsaan dan Pelan Tindakan Jerebu Kebangsaan telah diaktifkan bagi menyelaraskan tindakan-tindakan agensi kerajaan dalam menangani isu pembakaran terbuka dan menghadapi situasi jerebu negara. Jabatan Alam Sekitar juga akan terus memantau kualiti udara di seluruh negara pada setiap jam.

Siasatan dan penguatkuasaan akan terus dilaksanakan ke atas titik-titik panas yang dikenapasti di dalam negara. Walaubagaimanapun, **jerebu merentas sempadan adalah punca utama jerebu di seluruh negara.**

Pada 6 Ogos 2019, Malaysia telah membangkitkan isu jerebu rentas sempadan dalam Mesyuarat Ke-21 *Technical Working Group (TWG)* dan *Sub-Regional Ministerial Steering Committee (MSC) on Transboundary Haze Pollution* yang turut dihadiri oleh Brunei Darussalam, Indonesia, Singapura dan Thailand. Dalam mesyuarat ini negara ahli MSC telah berikrar untuk berwaspada, memantau, mempertingkatkan langkah-langkah pencegahan bagi meminimalkan sebarang kejadian jerebu rentas sempadan semasa cuaca panas dan kering di antara bulan Ogos hingga Oktober 2019. Negara ahli MSC juga telah bersetuju untuk meningkatkan kerjasama menangani pencemaran jerebu merentas sempadan secara berkesan selaras dengan *Roadmap on ASEAN Cooperation towards Transboundary Haze Pollution Control with Means of Implementation*. Berdasarkan komitmen yang telah diberikan semasa, adalah dipercayai bahawa semua negara ahli MSC sedang berusaha sebaik mungkin bagi menyelesaikan masalah jerebu rentas sempadan pada ketika ini.

Sehubungan dengan itu, Malaysia akan terus berkerjasama dengan negara jiran terutamanya Indonesia bagi menangani isu jerebu rentas sempadan. Di peringkat kementerian, MESTECC akan menyelaraskan agar nota diplomatik dikemukakan kepada pihak Indonesia supaya tindakan segera diambil untuk memadamkan kebakaran dan mencegah kebakaran daripada berulang.

Kerajaan Negeri dan Kerajaan Tempatan dan semua pemilik tanah dinasihatkan supaya memantau secara rapi kawasan-kawasan yang mudah dan sering terbakar seperti tapak pelupusan sampah, hutan, tanah gambut, ladang, kawasan pertanian dan industri dan mengambil langkah-langkah untuk mencegah pencerobohan oleh pihak-pihak yang tidak bertanggung jawab sehingga menyebabkan pembakaran terbuka sama ada untuk tujuan tertentu atau dengan tidak sengaja. Menurut Seksyen 29(A), Akta Kualiti Alam Sekeliling 1974, mereka yang disabitkan dengan kesalahan melakukan pembakaran terbuka boleh dikenakan denda tidak melebihi RM500,000 atau penjara selama tempoh tidak melebihi 5 tahun atau kedua-duanya sekali. Kompaun maksimum sebanyak RM2,000 juga boleh dikenakan atas setiap kesalahan.

Orang awam terus diingatkan agar tidak melakukan pembakaran terbuka, bekerjasama memadam kebakaran-kebakaran kecil dan melaporkan kes-kes pembakaran terbuka atau kebakaran kepada Jabatan Bomba dan Penyelamat Malaysia di talian **999** dan Jabatan Alam Sekitar di talian bebas tol, **1-800-88-2727**.

**KEMENTERIAN TENAGA, SAINS, TEKNOLOGI,
ALAM SEKITAR DAN PERUBAHAN IKLIM
DAN
JABATAN ALAM SEKITAR**

6 SEPTEMBER 2019

Sebarang maklumat lanjut, sila hubungi:

- 1. Encik Ahmad Saifful Bin Salihin**
No. Tel: 019-223 2375 / 082-482535
- 2. Puan Mazrini Binti Mohmad**
Tel: 016-233 5559 / 03-8885 8676